

**Umno Tidak Pernah Halang Anggota Bahas Isu Sensitif: Hishammuddin  
Bernama  
24 November , 2011**

KUALA LUMPUR, 24 Nov (Bernama) -- Umno tidak pernah samasekali menghalang para perwakilan membahaskan isu sensitif di Perhimpunan Agungnya, kata Naib Presiden parti Datuk Seri Hishammuddin Tun Hussein.

Beliau berkata Umno sentiasa terbuka menerima apa jua pandangan dan cadangan perwakilan daripada akar umbi selaras dengan Program Transformasi Politik (PTP) yang diilhamkan Presiden Umno yang juga Perdana Menteri Datuk Seri Najib Tun Razak.

"Kita tidak pernah mengenakan sekatan terhadap sebarang topik yang akan dibahaskan perwakilan, ia tidak pernah menjadi sebahagian daripada amalan atau dasar parti ini.

"Tidak ada kekangan daripada dahulu lagi tetapi jurucakap-jurucakap (pembahas) kita yang sayangkan parti tidak mungkin akan gunakan platform (perbahasan) untuk memecah-belahkan parti, lebih-lebih lagi dalam keadaan kita nak berdepan dengan pilihan raya umum," katanya dalam sidang akhbar khas sempena Perhimpunan Agung Umno 2011 di sini Khamis.

Hishammuddin, yang juga Pengerusi Jawatankuasa Usul Perhimpunan Agung Umno 2011, memaklumkan pihaknya telah menerima sebanyak 617 usul daripada 191 Umno bahagian yang telah bermesyuarat.

Daripada jumlah itu, sebanyak 572 usul berkaitan dengan jabatan dan agensi kerajaan telah dihantar untuk perhatian kementerian berkaitan manakala baki 45 usul lagi adalah usul yang berbentuk sokongan kepada usaha kerajaan dan parti, yang diterima tanpa dibahas.

Perhimpunan Agung Umno 2011 yang akan berlangsung selama lima hari bermula Selasa depan, katanya, menumpukan kepada tiga usul utama iaitu perbahasan ucapan dasar presiden, usul ekonomi serta usul pendidikan, sosial dan agama.

Menurut Hishammuddin, kalau dipecahkan mengikut kategori pula, dua usul adalah yang melibatkan pindaan perlembagaan, politik (116), ekonomi (24), agama (78), sosial (44), pendidikan (115) dan lain-lain (193).

Kepada soalan sama ada semua usul politik lebih menjurus ke arah persiapan pilihan raya umum ke-13, beliau berkata kebanyakannya berkisar hal dalaman parti.

"Kita kena faham, usul-usul yang dibawa oleh Umno bahagian pada ketika itu tidak ada tekanan yang mendesak mengenai pilihan raya umum ke-13. Tetapi hari ini bila kita nak bincangkan usul perhimpunan agung, kita tidak boleh lari daripada hakikat bahawa mungkin ini adalah perhimpunan agung yang terakhir.

"Kita kena pastikan suara Umno bukan sahaja dapat didengari tetapi mestilah suaranya padu dan memahami apa yang dituntut oleh pucuk pimpinan," katanya.

Menyentuh saranan mantan Perdana Menteri Tun Dr Mahathir Mohamad supaya para

perwakilan membuat teguran secara sopan dan berhati-hati bagi mengelakkan ia dijadikan isu oleh pembangkang, Hishammuddin yang juga Menteri Dalam Negeri berkata kenyataan bekas Presiden Umno itu hanya merupakan ingatan kepada anggota parti.

"Saya percaya Tun sayang kepada parti dan selalunya perhimpunan agung, ianya satu detik masa yang penting untuk Umno setiap tahun. Saya merasakan Tun terpanggil untuk mengingatkan perwakilan apa sebenarnya tanggungjawab dan tugas kita.

"Mereka (perwakilan) datang ke Kuala Lumpur termasuk saya sendiri adalah mewakili ahli-ahli kita di bawah sana dan bukan untuk diri sendiri. Sebab itu tanggungjawab dan amanah itu perlu dipikul dengan bersungguh-sungguh. Itu agaknya ingatan Tun kepada kita," katanya.

Mengulas mengenai terdapatnya diskriminasi terhadap pengamal media khususnya media alternatif oleh Umno, Hishammuddin berkata Umno tidak pernah menyekat mana-mana organisasi media untuk membuat liputan perhimpunan agung parti itu.

Katanya, Umno berbeza dengan pembangkang, yang menyekat mana-mana media daripada membuat liputan jika mendapati media berkenaan tidak memihak kepada mereka.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=629630>